


Tertib Surah	Nama Surah	Bilangan Ayat	Bilangan Ruku'	Makkiyyah / Madaniyyah	Tertib Turun	Bilangan Paragraf
Ke-79	An-Naazi'aat	46	2	Makkiyyah	Ke-81	6



Zaman Diturunkan

Surah An-Naazi`aat juga diturunkan di peringkat kedua kehidupan Rasulullah s.a.w. di Mekah di antara tahun ke-4 hingga ke-5 Kenabian, ia diturunkan selepas daripada Surah an-Naba' setelah da`wah secara terbuka dilancarkan. Ketika itu orang-orang Quraisy banyak memperkatakan tentang hari kiamat, mereka berbeza pendapat tentangnya dan sebahagian daripada mereka telah pun bersikap keras kepala seperti Fir'aun dan pengikut-pengikutnya.

Perkaitan Surah An-Naazi`aat Dengan Surah Sebelum Dan Selepasnya

Di dalam Surah an-Naba' sebelum ini telah dikemukakan perbandingan di antara golongan الطَّاعِينَ dan golongan الْمُتَّقِينَ, di dalam Surah An-Naazi`aat ini pula dibuat perbandingan di antara golongan الطَّاعِينَ dan golongan yang takut kepada tuhan.

Beberapa Kata Kunci Dan Tema Utama Surah

1. Di dalam surah ini, orang-orang yang takut kepada Allah dibandingkan dengan orang-orang yang طَّاغِينَ iaitu orang-orang yang derhaka kepada Allah.
2. Di dalam surah ini 3 kali digunakan perkataan خَشْيَةَ (Ayat: 19, 26 dan 45).
 - (a) Nabi Musa telah menyeru Fir'aun supaya menyucikan dirinya supaya timbul rasa takut kepada Allah di dalam hatinya (Ayat: 19).
 - (b) Pada kebinasaan kaum Fir'aun terdapat pengajaran bagi orang-orang yang takut kepada Allah (Ayat: 26).
 - (c) Rasulullah s.a.w. diberitahu dengan terus terang bahawa Baginda hanya seorang مُنْذِر (yang memberi ancaman), ancaman Baginda hanya berguna kepada orang-orang yang takut kepada hari akhirat.
3. Syurga akan dimasuki setiap orang yang mengelak dirinya daripada طُغْوَى (kederhakaan) dan cintakan dunia di samping menjalani kehidupan dengan penuh tanggungjawab dan kesediaan untuk menghadapi Allah di hari kiamat nanti (Ayat: 40).
4. Perkataan طَغَى digunakan sebanyak 2 kali di dalam surah ini (Ayat: 17 dan 37).
 - (a) Allah s.w.t. memerintahkan kepada Musa supaya pergi berda`wah kepada Fir'aun kerana ia sudah pun derhaka (Ayat: 17).
 - (b) Setiap orang yang mengutamakan dunia daripada akhirat dan derhaka kepada Allah akan masuk neraka (Ayat: 37 hingga 39).